

BOSNA I HERCEGOVINA
Konkurencijsko vijeće



БОСНА И ХЕРЦЕГОВИНА
Конкуренијски савјет

ZAKLJUČAK
o odbacivanju Prijave namjere koncentracije privrednog subjekta „Blicnet“ doo
Banja Luka

Sarajevo,
Mart, 2026. godine



Broj: UP-05-26-1-039-10-/25
Sarajevo, 24.3.2026. godine

Konkurencijsko vijeće Bosne i Hercegovine na osnovu člana 25. stav (1) tačka e), člana 42. stav (2), a u vezi s čl. 12., 14. i 16. Zakona o konkurenciji («Službeni glasnik BiH», br. 48/05, 76/07 i 80/09), rješavajući po Prijavi namjere koncentracije privrednog subjekta „Blicnet“ doo Banja Luka, ul. Vuka Karadžića br. 2, 78000 Banja Luka, zaprimljenoj dana 27.10.2025. godine, pod brojem: UP-05-26-1-039-1/25, na svojoj 41. sjednici održanoj dana 24.03.2026. godine, donijelo je

ZAKLJUČAK

1. Odbacuje se Prijava namjere koncentracije privrednog subjekta „Blicnet“ doo Banja Luka, koja se odnosi na namjeru sticanje neposredne kontrole kupovinom ¹(..)** udjela u osnovnom kapitalu privrednog subjekta „KG1“ doo Goražde, radi nepostojanja obaveze podnošenja prijave, u smislu člana 14. stav (1) Zakona o konkurenciji.
2. Obavezuje se privredni subjekt „Blicnet“ doo Banja Luka, da uplati administrativnu taksu u ukupnom iznosu od 1.000,00 KM (hiljadu konvertibilnih maraka) u korist Budžeta institucija Bosne i Hercegovine.
3. Ovaj Zaključak bit će objavljen u „Službenom glasniku BiH“, službenim glasnicima entiteta i Brčko Distrikta Bosne i Hercegovine.

OBRAZLOŽENJE

Konkurencijsko vijeće Bosne i Hercegovine (u daljem tekstu: Konkurencijsko vijeće) je dana 27.10.2025. godine, pod brojem: UP-05-26-1-039-1/25, zaprimilo Prijavu namjere koncentracije (dalje u tekstu: Prijava) privrednog subjekta „Blicnet“ doo Banja Luka, ul. Vuka Karadžića br. 2, 78000 Banja Luka (dalje u tekstu: Podnosilac prijave ili Blicnet), koja se odnosi na namjeru sticanje neposredne kontrole kupovinom (..)**udjela u osnovnom kapitalu privrednog subjekta „KG1“ doo Goražde (dalje u tekstu: ciljno društvo ili KG1) od fizičkih lica (..)**.

Prijava je dopunjena podneskom broj: UP-05-26-1-039-5/25 dana 5.1.2026. godine, dokumentacijom i pojašnjenjem na zahtjev Konkurencijskog vijeća od 22.12.2025. godine, te podneskom broj: UP-05-26-1-039-7/25 od 9.2.2026. godine na zahtjev od 22.1.2026. godine.

¹(..)** podatak predstavlja poslovnu tajnu

Podnosilac prijave je naveo da ima namjeru podnijeti zahtjev za ocjenu ove transakcije i drugim tijelima nadležnim za zaštitu konkurencije i to: u Republici Srbiji, Crnoj Gori i Sjevernoj Makedoniji.

Prijava je podnesena u roku propisanom odredbama Zakona o konkurenciji.

Konkurencijsko vijeće je Podnosiocu prijave, u smislu člana 30. stav (3) Zakona, Potvrdu o prijemu kompletne i uredne Prijave izdalo dana 24.3.2026. godine pod brojem: UP-05-26-1-039-8/25.

Analizom Prijave i podataka iz dostavljene dokumentacije, Konkurencijsko vijeće je utvrdilo sljedeće:

1. Učesnici koncentracije i njihova vlasnička struktura

Učesnici koncentracije su privredni subjekti: „Blicnet“ doo Banja Luka i „KG1“ doo Goražde

1.1. Privredni subjekt „Blicnet“ doo Banja Luka, kao podnosilac prijave

Privredni subjekt Blicnet društvo sa ograničenom odgovornošću za telekomunikacije Banja Luka, sa sjedištem na adresi Vuka Karadžića br.2, 78000 Banja Luka, registrovan je kod Okružnog privrednog suda u Banja Luci pod matičnim brojem 1-3645-00.

Privredni subjekt „Telekomunikacije Republike Srpske“ a.d. Banja Luka, registrovan kod Agencije za posredničke, informatičke i finansijske usluge Republike Srpske, pod matičnim brojem 01772902, sa registrovanim sjedištem na adresi Vuka Karadžića br.2, 78000 Banja Luka, je osnivač i 100% vlasnik Podnosioca prijave. Posluje i pod imenom „Mtel“ a.d. Banja Luka.

Podnosilac prijave je registrovani operator elektronskih komunikacijskih usluga, koji pruža usluge na osnovu dozvola Regulatorne agencije za komunikacije Bosne i Hercegovine (dalje u tekstu: RAK) za obavljanje djelatnosti: a) operatora javnih elektronskih komunikacijskih mreža i davaoca fiksnih javnih telefonskih usluga, b) aktivnih pružalaca javnih mobilnih telefonskih usluga (SP), c) davaoca pristupa Internetu d) pružanja usluga distribucije audiovizuelnih medijskih usluga i medijskih usluga radija i e) pružanja audiovizuelnih medijskih usluga na zahtjev.

Sve navedene dozvole RAK-a su izdate za obavljanje djelatnosti i pružanje usluga na cijeloj teritoriji Bosne i Hercegovine.

Povezana društva Podnosioca prijave, u smislu zajedničkog osnivača i njegovog većinskog vlasništava u istim, su sljedeći privredni subjekti: „LOGOSOFT“ doo Sarajevo i „Financ“ doo Banja Luka.

1.1.1 Privredni subjekt „LOGOSOFT“ doo Sarajevo, društvo za informatički inženjering, registrovan kod Općinskog suda u Sarajevu, pod br.65-01-0594-11, u 100% vlasništvu privrednog subjekta „Telekomunikacije Republike Srpske“ a.d. Banja Luka,

pruža usluge iz segmenta fiksne telefonije, mobilne telefonije, interneta i prenosa podataka, ICT usluga, integrisanih usluga, multimedije i dr.

1.1.2. Privredni subjekt „Financ“ doo Banja Luka, registrovan pod brojem 057-0-Reg-Z-25-005262 u (..) ** vlasništvu privrednog subjekta „Telekomunikacije Republike Srpske“ a.d. Banja Luka, pruža usluge posredovanja u prodaji prepaid usluga – elektronskih dopuna, prepaid brojeva i vaučera, drugog prepaid programa i posredovanja u zaključivanju korisničkih ugovora sa Mtelom, internet igara na sreću i dr.

1.2. Privredni subjekt „KG1“ doo Goražde, kao ciljno društvo

Privredni subjekt „KG1“ doo Goražde, sa adresom Naselje panorama bb, 73000 Goražde, registrovan u Općinskom sudu u Goraždu, s matičnim brojem: 1-299 u vlasništvu je fizičkih lica (..) ** .

Ciljno društvo je registrovani operater telekomunikacija koje pruža usluge korisnicima na osnovu dozvola RAK-a za obavljanje djelatnosti: a) pristupa internetu, b) distribuciju audiovizuelnih medijskih usluga i medijskih usluga radija, c) operatora javnih elektronskih komunikacijskih mreža. Dozvole RAK-a navedene pod a) i b) su izdate za cijelu teritoriju Bosne i Hercegovine dok je dozvola pod c) za područje opštine Goražde.

Ciljno društvo posjeduje vlastitu telekomunikacionu mrežu i mrežnu infrastrukturu, i posjeduje Dozvolu za obavljanje djelatnosti javnih telefonskih komunikacionih mreža, koju je izdala RAK za područje grada/opštine Goražde, ali ne posjeduje dozvolu za obavljanje djelatnosti fiksnih javnih telefonskih usluga.

Podnosilac prijave posjeduje dozvolu za ovu djelatnost. Ciljno društvo sa Podnosiocem prijave ima Ugovor o poslovno - tehničkoj saradnji, zaključen dana (..) **.

Ciljno društvo nema povezanih privrednih subjekata, u smislu vlasničke strukture, na teritoriji Bosne i Hercegovine.

2. Pravni okvir ocjene koncentracije

Konkurencijsko vijeće je u provođenju postupka ocjene dopuštenosti predmetne koncentracije primijenilo odredbe Zakona, Odluke o načinu podnošenja prijave i kriterijima za ocjenu koncentracija privrednih subjekata ("Službeni glasnik BiH", broj 34/10) i Odluke o utvrđivanju relevantnog tržišta ("Službeni glasnik BiH", br. 18/06 i 34/10).

3. Pravni osnov i oblik predmetne koncentracije

Pravni osnov koncentracije jeste Pismo o namjerama, broj (..) **.

Krajnji datum za zatvaranje transakcije je (..) **, uz mogućnost prolongiranja istog, a u zavisnosti od trajanja postupaka pred regulatornim tijelima.

Prijavljena namjera koncentracije se odnosi na sticanje neposredne kontrole Podnosioca prijave nad ciljnim društvom u smislu člana 12. stav (1) tačka b) podtačka (1) Zakona o konkurenciji.

4. Relevantno tržište

Relevantno tržište, u smislu člana 3. Zakona, te člana 4. i 5. Odluke o utvrđivanju relevantnog tržišta, čini tržište određenih proizvoda i/ili usluga koji su predmet obavljanja djelatnosti na određenom geografskom području.

Prema odredbi člana 4. Odluke o utvrđivanju relevantnog tržišta, relevantno tržište proizvoda obuhvata sve proizvode i/ili usluge koje potrošači smatraju međusobno zamjenjivim s obzirom na njihove bitne karakteristike, kvalitet, namjenu, cijenu ili način upotrebe.

Član 5. Odluke o utvrđivanju relevantnog tržišta, propisuje da relevantno tržište u geografskom smislu obuhvata cijelu ili dio teritorije Bosne i Hercegovine, na kojoj su tržišni konkurenti aktivni u prodaji i/ili kupovini relevantnog proizvoda pod jednakim ili dovoljno ujednačenim uslovima koji to tržište bitno razlikuju od uslova tržišne konkurencije na susjednim geografskim tržištima.

Relevantno geografsko tržište u predmetnoj koncentraciji obuhvata cijeli teritorij Bosne i Hercegovine, jer su učesnici koncentracije nosioci relevantnih dozvola RAK-a za obavljanje djelatnosti na nacionalnom nivou.

Uzimajući u obzir prirodu poslovne djelatnosti koju obavljaju učesnici koncentracije, te postojanje važećih dozvola za obavljanje iste, izdatih od strane RAK-a, kao i činjenicu da Ciljno društvo pruža isključivo usluge interneta i televizije, relevantno tržište za ovu transakciju jeste:

4.1. Maloprodajno tržište pružanja usluga fiksnog širokopolasnog pristupa internetu na tržištu Bosne i Hercegovine

Opšte je poznata činjenica da je pristup internetu danas omogućen putem svih naprednih elektronskih uređaja, koji su po pravilu prenosivi, te se može smatrati da je tržište pružanja usluga interneta nacionalno. Evropska Komisija je također stava da je tržište pružanja usluga pristupa internetu krajnjim korisnicima nacionalno, budući da su marketing, komercijalne i tehničke usluge, cjenovna politika i sl. usmjereni ka nacionalnom tržištu. Tako i operatori u BiH, usmjeravaju poslovanje na korisnike širom BiH, ne praveći razliku među korisnicima po osnovu dijela teritorija na kojem se isporučuje usluga.

4.2. Maloprodajno tržište distribucije audiovizuelnih medijskih usluga i medijskih usluga radija na tržištu Bosne i Hercegovine

Evropska Komisija je zauzela stav da je tržište distribucije audiovizuelnih medijskih usluga i medijskih usluga radija, nacionalno po obimu, i to po svojoj prirodi, imajući u vidu različite parametre kao što je lingvistička homogenost tržišta, kulturološki faktor i druge razlike u uslovima koji preovladavaju u pojedinačnim državama. S toga se i u predmetnoj koncentraciji, maloprodajno tržište distribucije audiovizuelnih medijskih usluga i medijskih usluga radija može smatrati kao nacionalno tržište, tj. tržište Bosne i Hercegovine.

5. Ocjena prijave namjere koncentracije

Konkurencijsko vijeće je nakon analize podataka iz Prijave, utvrdilo da učesnici koncentracije nisu bili u obavezi podnijeti prijavu namjere koncentracije budući da nisu ispunjeni uslovi propisani članom 14. stav (1) tačke b) Zakona.

Naime, Podnosilac prijave, dostavio je propisno ovjerene finansijske izvještaje za 2024. godinu, koji prikazuju sljedeće podatke o ukupno ostvarenom prihodu na domaćem i na inostranom tržištu, kako slijedi:

Tabela 1.

| Privredni subjekt | Prihod ostvaren prodajom na tržištu BiH u KM | Prihod ostvaren prodajom na svjetskom tržištu u KM |
|-------------------|--|--|
| Mtel grupa | (..)** | (..)** |
| Ciljno društvo | (..)** | (..)** |

*Podaci iz prijave i priloženih finansijskih dokumenata

Konkurencijsko vijeće analiziralo je i podatke objavljene od strane RAK-a, koji se odnose na pregled i tržišno učešće ključnih konkurenata učesnika predmetne koncentracije za 2024. godinu, na ovako definisanim relevantnim tržištima, na cijeloj teritoriji Bosne i Hercegovine:

5.1. Maloprodajno tržište pružanja usluga fiksnog širokopojasnog pristupa internetu na tržištu u Bosni i Hercegovini

Tabela 2.

| Red.br. | Operater | Tržišno učešće % |
|---------|---|------------------|
| 01. | BH Telekom | (..)** |
| 02. | Mtel grupa | (..)** |
| 03. | HT Mostar | (..)** |
| 04. | Telemach | (..)** |
| 05. | Dasto Semtel | (..)** |
| 06. | TX TV | (..)** |
| 07. | DSL – Elektronika | (..)** |
| 08. | KG1 | (..)** |
| 09. | Ostali | (..)** |
| | Ukupno | 100,00 |
| | 02+08 (učesnici koncentracije zajedno) | (..)** |

*Podaci o tržišnom učešću navedeni u Tabeli 2. su objavljeni od strane RAK- a i dostupni su na web stranici

5.2. Maloprodajno tržište distribucije audiovizuelnih medijskih usluga i medijskih usluga radija

Tabela 3.

| Red.br. | Operater | Tržišno učešće % |
|------------|---|------------------|
| 01. | BH Telekom | (..)** |
| 02. | Mtel grupa | (..)** |
| 03. | HT Mostar | (..)** |
| 04. | Telemach | (..)** |
| 05. | TX TV | (..)** |
| 06. | KG1 | (..)** |
| 07. | Ostali | (..)** |
| | Ukupno | 100,0 |
| | 02+06 (učesnici koncentracije zajedno) | (..)** |

*Podaci o tržišnom učešću navedeni u Tabeli 3. su objavljeni od strane RAK-a i dostupni su na web stranici

U skladu sa iznesenim zvaničnim podacima, zaključeno je da učesnici koncentracije ne ispunjavaju ni uslov u pogledu zajedničkog tržišnog učešća, kako na relevantnom maloprodajnom tržištu pružanja usluga fiksnog širokopojsnog pristupa internetu tako i na maloprodajnom tržištu distribucije audiovizuelnih medijskih usluga i medijskih usluga radija, a sve u skladu s odredbom člana 14. stav (1) pod b) Zakona o konkurenciji.

Podnosilac prijave trenutno nema planove za ulaganja u razvoj, ali navodi da mu se sticanjem kontrole nad ciljnim društvom, otvaraju mogućnosti unapređenja poslovanja i smanjenja troškova poslovanja, što će imati uticaja i na pogodnosti za potrošače u smislu:

- proširenja palete proizvoda i usluga dosadašnjim korisnicima ciljnog društva, te njihov bolji kvalitet,
- korištenje usluga boljih performansi, usluga sa značajno bogatijim sadržajem i korištenje (..)**,
- te će kroz veći spektar kvalitetnijih usluga moći obezbijediti bolji odnos cijene i kvaliteta usluga za potrošače.

Na osnovu svega naprijed navedenog, Konkurencijsko vijeće je odlučilo kao u dispozitivu ovog Zaključka.

6. Administrativna taksa

Podnosilac Prijave na ovaj Zaključak, u skladu sa članom 2. Tarifni broj 108. tačka c) Odluke o visini administrativnih taksi u vezi sa procesnim radnjama pred Konkurencijskim

vijećem ("Službeni glasnik BiH", br. 30/06, 18/11 i 75/18) dužan je platiti administrativnu taksu u ukupnom iznosu od 1.000,00 KM u korist Budžeta institucija Bosne i Hercegovine.

7. Pouka o pravnom lijeku

Protiv ovog Zaključka nije dopuštena žalba.

Predsjednica

Ninela Salihbašić